

天岳山館文鈔

天岳山館文鈔目錄五

平江 李元度 次書

別傳 事略 行狀

傳爲史之一體方望溪曰文士不得私爲達官立傳韓退之傳陸
贄陽城載順宗實錄不入私集也必阨窮隱約國史所不列文章
家乃私錄而傳之劉海峰曰達官名人之傳史氏職之文士作傳
巧者種樹之流而已其人旣稍顯卽不當爲之傳爲之行狀上史
官而已然歸震川嘗謂古作海內先賢傳及魯國楚國先賢諸傳
者皆非蘭臺石室之臣也姚姬傳則謂古史傳不甚拘品位又實
錄書人臣卒必撮敘其平生賢否今實錄不記臣下之事史館非
一二品官及死事者不得立傳然則史之傳者無幾矣故特發斯

義使後之文士擇焉余攷唐李習之集有東川節度使盧坦傳東坡集有太常少卿贈工部侍郎陳希亮傳皆達官也又攷史記平原君傳徐廣註引魏公子傳曰趙惠文王弟則戰國時已有傳之名太平御覽書目列古人別傳自東方朔陸續至顧含何禎共百一十篇是古又有別傳之體別傳者明其別於史傳也既別於史傳何不可作之有

章氏學誠曰古經史無分科春秋三傳各記所聞依經起義雖謂之記可也二戴記禮各傳其說附經而行雖謂之傳可也後世以錄人物者爲傳敘事蹟者爲記然如襄陽耆舊記之類敘人何嘗不稱記龜筮西域諸傳述事何嘗不稱傳今必謂不居史職不宜

爲傳然則不爲經師又豈宜更爲記耶前明嘉靖後文人各分門戶因持高論以攻王李後儒和之不知傳記盡人可爲必拘拘於正史列傳則雖身居史職除史傳外又豈可別自爲私傳耶

又曰後漢書鄧禹傳范氏有所本則固先有私傳矣三國志裴注引東京魏晉諸家私傳相證明者凡數十家其見於隋唐經籍藝文志者如東方朔傳陸先生傳之類不一而足又文苑英華有傳五卷其中正傳之體公卿則有李華撰兵部尚書梁公李峴傳文學則有盧藏用撰陳子昂傳節操則有鄭亞之撰李紳傳貞烈則有李翱撰楊烈婦傳杜牧撰竇貞女傳此類凡十餘篇皆非史官作也論者但見文選及唐宋八家鮮入此體遂創此說以矜有識

耳

又曰史傳之作例取蓋棺論定兩漢以下如非有先生李赤諸傳皆以傳爲游戲坊者橐駝則借傳爲議論至何蕃方山子等傳則又兼作贈序之用沿至宋人遂多爲生人作傳非史法也然古人亦多有之三國志龐清母趙娥爲父報仇殺人注引皇甫列女傳云故黃門侍郎梁寬爲其作傳唐李翱撰楊烈婦傳其時楊尙生存是未嘗不爲生人作傳也但包舉一生如史漢列傳體則必不可若傳其一節固無不可耳余案望溪海峰姬傳皆以唐宋八家爲宗故立論如此章氏通論文史則義非可以一端盡矣集中別傳皆已故之人生傳則自貞烈女婦外概不敢作

集中別傳獨多繇軍興以來節烈魁壘之士大半皆吾同事也不則亦嘗通音問者也耳目既相接故傳之以存其真昔太史遷言荊軻微夏無且言大將軍微蘇建言留侯微畫容貌而震川則自恨足迹不出里閭所見聞無奇節偉行可紀然則奇節偉行之多而有微庸有過於今日乎此時爲之也

凡傳自漢書以下皆書名史記或書名或書字或書官或書爵集中既爲別傳故稱某公某君某先生明其與史傳別也又凡傳志之文官與地必書本朝之名紀實也惟序記中偶書古官名地名蓋自唐以後多有至今沿之存當時語耳若傳誌終以紀實爲正章氏曰婦女有名者稱名無名則稱姓如曰張曰李之類左史以

來通例也後世文家史志家乃稱之曰氏甚且稱爲該氏則案牘
之辭於文爲鄙俚矣又近人爲烈節婦女撰文往往不稱姓氏卽
以節婦烈女稱之雖本後漢書曹娥叔先雄二傳並以孝女冠首
然此蔚宗之失也婦人守節比於男子効忠使爲逢比諸公作傳
不稱其名而稱忠臣云云有是理乎且卽以范史列女傳論曹昭
不聞署賢母蔡文姬不聞署才女皇甫不聞稱烈婦龐氏不聞稱
孝婦何獨於娥雄特異乎此亦習焉不察之一端也集中凡紀婦
行皆書姓除標題外不以貞女烈婦目其人

顧亭林謂古人年不書甲子以爾雅歲名歲陰爲目攷太史公律
歷志書閏逢攝提格而年表則書甲子司馬氏貞謂古鐘鼎從未

有以闕逢攝提格記年者鄭氏樵則謂今人編年以甲爲闕逢乙爲旃蒙是以一元大武爲牛也據此可知顧說之拘矣又揮子居曰尙書春秋皆書年數列史因之故記事之文以書年數爲是今參用之

古者婦人書姓男子書氏氏不可謂之姓鄭氏樵論之詳矣孔子弟子若有若曾參卜商仲由端木賜顓孫師等上一字或二字皆氏也非姓也集註云姓有名若姓曾名參等類皆誤闔百詩辨之矣集中傳志皆曰公某氏或曰某縣某氏不及姓者思貽姓氏不分之誚也又滿洲蒙古人姓名與春秋時人同其名之上一字亦非姓也集中書滿蒙人必稱某某公不與漢人書氏者混

古書之以略名者若黃石公三略淮南子要略以及張溫之三史略魚豢之典略皆有取乎謨略之遺不特劉歆校書分七略鄭樵通志分二十略也漢丞相倉曹傳朝幹作楊原伯行狀見文章緣始江淹作宋太妃周氏行狀見本集是爲行狀所繇始二者皆傳之屬也故以附焉

王魯齋曰衛公叔文子卒其子請謚於君曰日月有時將葬矣請所以易其名者請謚之詞意者今世行狀之始也自唐以來有官不應謚亦爲行狀蓋將求名世之士爲之誌銘云爾

黃梨洲曰行狀爲議謚而作與求銘而作者稍異爲請謚作者如昌黎狀董晉柳州狀段太尉狀柳渾是也其文當上史館牒太常

宜將諡法配之可不書婦娶子姓然董晉狀則亦書子姓矣爲求
文作者如昌黎之狀馬韓柳州之狀陳京白香山之狀其祖若父
皆是也婦人之行不踰梱可不爲行狀然自江淹外任昉裴子野
集中並有婦人行狀則婦人之狀固早有例矣

林文忠公別傳 李文恭公別傳 江忠烈公別傳 塔忠武

公別傳 羅忠節公別傳 李忠武公別傳 王壯武公別傳

張忠毅公別傳 江誠恪公別傳 蕭壯果公別傳 周節愍

公別傳 劉武烈公別傳 鄧忠武瞿威壯公別傳 蕭節愍

周貞愍別傳 陳威肅公別傳 蕭剛勇彭果毅劉忠壯周愍

烈彭武烈公別傳 曾愍烈曾靖毅公別傳 贈太常寺卿孫

君丁君別傳 贈太僕寺卿何君別傳 贈道員林君別傳

贈按察使郭君別傳 布政使銜選用道屈君別傳 鹽運使

銜浙江簡用道彭君別傳 贈知府童君別傳 多忠勇公別

傳 童壯節彭勤勇二公別傳 贈參將候補游擊黃君別傳

李剛烈王武愍二公別傳 饒莊勇公別傳 陳壯節江壯

節蕭壯節三公別傳 呂孝子傳 李忠壯公別傳 陳武烈

郭勇烈王剛毅公別傳 石剛介滕武烈熊勤勇公別傳 彭

忠壯公別傳 高勇烈公別傳 李壯烈公別傳 劉忠壯公

別傳 黃忠壯鄧壯毅公別傳 常文節公別傳 羅文僖公

別傳 勞文毅公別傳 胡文忠公別傳 江西按察使鄧公

別傳 贈太常寺卿江西候補知府羅君別傳 贈太常寺卿

運同銜河南補用直隸州田君別傳 印江縣知縣鄧君別傳

吳文節公別傳 呂文節公別傳 何文貞公別傳 羅壯節

公別傳 趙忠節公別傳 江西委用道前翰林院編修帥君

傳 駱文忠公別傳 湖南巡撫後官雲貴總督張公別傳

劉豫川李寶秋別傳 卹贈同知候選教諭耿君別傳 宜黃

縣知縣傅君別傳 湖南三節令傅 吳伯俞傳 鹽運使銜

江西鹽法道余公家傳 敕祀鄉賢 封奉直大夫龍公家傳

右春坊右贊善前翰林院侍講朱蘭坡先生傳 宋理卿先

生傳 沅陵縣知縣升武岡州知州洪公別傳 彭晉篋孝廉

傳 夏子嘉司馬家傳 李紫笙刺史傳 族楷臣先生傳

楊价人先生家傳 吳烈婦傳 湯烈婦傳 吳貞女傳 旌

表節孝劉母彭太宜人傳 旌表貞孝女姚氏傳

方敬齋中丞事略 沈文肅公事略 誥贈光祿大夫先大父

星垣公事略 先大母徐太夫人事略 誥贈光祿大夫先府

君事略 卹贈同知五品銜節選知縣從兄擴湖事略

曾文正公行狀

天岳山館文鈔卷五

林文忠公別傳

道光三十年春

文宗皇帝既嗣服下 詔求賢時太子太保雲貴總督侯宮林公

方引疾家居潘文恭世恩杜文正受田交章以公應 詔奉 召

入都未卽至九月

上以粵逆洪秀全等稔亂 特命公爲 欽差大臣馳赴廣西督

剿尋 命署廣西巡撫事公故嘗督粵威惠著聞中外想望丰采

至是力疾出粵民額手相慶賊黨散大半秀全懼謀遁入海十一

月公行次潮州薨遺疏入

天岳山館文鈔卷五

上震悼優詔議卹 賜祭葬 予諡文忠自公薨後軍民失所倚
賊寢不可制未幾踰嶺涉湘絕長江踞金陵爲窟穴蹂躪遍天下
又十四年竭海內全力廩乃克之論者謂生靈多阨致天不愍遺
使得假公數年賊不足平矣然公之身繫天下安危尤不始此也
先是公總督湖廣時鴻臚卿黃公爵滋疏請禁鴉片以塞漏卮
詔下中外大臣議公條上利害

宣廟嘉焉十八年冬

命以 欽差大臣蒞廣東查辦海口事務明年補兩廣總督公宣
諭 德威繕守備於虎門各海口添建礮臺設木柙鐵索奏移高
廉道駐澳門撥隸水師資控馭時通商之國以十數咸傾心受約

束惟英吉利持兩端九月夷目義律等以索食爲名糾師船犯尖
沙嘴公遣參將賴恩爵擊走之斷其接濟尋六犯海口皆受懲創
義律潛赴澳門倩西洋夷目遞說帖求轉圜公以其言未可信奏
請 敕福建浙江江蘇諸督撫嚴防各海口復奏俾其貿易英人
屢撼之不動則大懼旣以粵之無隙可乘也乃改圖犯浙陷定海
掠甯波沿海騷動在事者莫能折衝禦侮爭歸咎公因中傷之代
者至悉反公所爲恐和議之不速成也撤公所設各隘兵以媚之
英人遂徑犯粵城公知事不可爲具遺疏以待圍解 命以四品
卿銜赴鎮海軍營効力尋謫戍伊犁海疆事自此益棘王文恪鼎
湯文端金釗至以死生去就爭之卒爲忌者所持不能得向令公

得始終其事決裂不至此公之爲天下重也可勝道哉公諱則徐字元撫一字少穆父賓日歲貢生家貧力學以經術掖後進有子三公其次也生而警敏長不滿六尺英光四射聲如洪鐘每劇談隔舍數重聆之輒了了年十三補弟子員二十舉於鄉就某邑令記室閩撫張公師誠見所削牘奇之延入幕嘉慶十六年公年二十有七成進士選庶吉士派習國書授編修益究心經世學雖居清秘於六曹事例因革用人行政之得失綜核靡遺識者知爲公輔器矣典江西雲南鄉試分校已卯會試咸得士二十五年補御史海寇張寶投誠後累官副將至是擢總兵公慮其愈驕蹇不可制也疏劾之

仁宗躋其旨授杭嘉湖道修海塘興水利士民德之會聞父病卽引疾不待命馳歸道光二年授淮海道明年擢江蘇按察使決獄平恕民稱林青天尋丁母憂明年奉旨赴南河督修隄工工竣仍回籍六年夏命署兩淮鹽政以未終制辭不拜七年按察陝西遷江甯布政使父憂歸潛福州西湖以惠桑梓十年夏補湖北布政使尋調河南十一年復調江甯遂擢東河總督疏辭

優詔不許尋奏言稽料爲河工第一弊端其門垛灘垛併垛諸名目非抽拔拆視難知底裏已將南北十五廳各垛逐查抗弊者察治得

旨向來河臣查驗料垛從未有精核如此者十二年春調江蘇巡

撫吳中府饑公奏免逋糧籌賑卹清釐各屬交代盡結京控諸獄
味爽視事夜過半方息數年如一日焉會考績疏言察吏莫先於
自察必將各屬大小政務逐一求盡於心然後能舉以驗屬吏之
盡心與否若夫吏之心先未貫徹於此事之終始又何從察其情
僞臣惟恃此不敢不盡之心事事與屬僚求實際耳公此言蓋生
平得力處也先是公任江藩以各屬水災建議倡捐糞賑資送留
養收骸瘞棺捐衣勸糶養佃典牛借籽種禁燒鍋凡十二則經江
督陶文毅劄奏行至是事竣在事者得獎敘公之爲臬司也奉
詔綜辦三江水利以憂歸嗣經陶公奏允孟瀆劉河分年籌辦至
是孟瀆工竣公以劉河爲三江之一淤墊尤甚請勘辦從之又言

江蘇錢漕倍他省其中有緩有急有舊有新勢難一律清款與其漫無區別徒令剗肉補瘡莫若專嚴於提新而暫緩於補舊新款果能全解則州縣無新虧舊欠亦可冀彌補得

旨竭力爲之江南人文甲天下鄉試恆萬六七千人入鏤院時竭一晝夜之力不能畢有擁擠仆斃者公創設信礮立燈牌陰以兵法部勒之日晡而畢十七年春擢湖廣總督荆襄苦水患歲以爲常公躬自監視隄工奏籌襄陽等屬鹽務緝私及辰沅道屬苗匪屯務各事宜皆如議行尋疏報南北兩省拏獲興販鴉片之奸民璽書褒美又以江漢安瀾請列漢神於祀典從之十八年冬入覲賜紫禁城騎馬遂有粵東之

命公之在粵也奏虎門收繳英吉利躉船鴉片已十逾其八得旨褒敘及奏請剿撫兼施

手敕報曰既有此番舉動若再示柔弱則大不可朕不慮卿等孟浪但誠卿等不可畏蕙先威後德控制之良法也尋請停貿易又諭曰該夷自外生成是彼曲我直中外咸知尙何足惜公前後所陳皆稱旨爲忌者所中傷卒不安其位而天下自此多故矣公議戍時河決開封首輔王公鼎出視工疏畱公督辦工成仍就戎有門下士官陝迎謁公竊爲不平見公談笑自若不敢言退謁鄭夫人曰甚矣此行也夫人曰子毋然朝廷以汝師能舉天下大局付之今決裂至此得保首領

天恩厚矣。臣子自負國耳。敢憚行乎。公在塞外奉命勘辦閒
壘事宜。親歷庫車阿克蘇烏什和闐喀什噶爾葉爾羌及伊拉里
克塔爾納沁等城。縱橫三萬餘里。水利大興。稍暇則以筆墨自娛。
公書具體歐陽詩宗白傳。在官事無巨細必躬親。家居必熟訪民
閒利病。白諸當道求題詠者。雖踵接不暇。應也。至是始得肆意遠
近爭寶之。伊犁爲塞外大都會。不數月。縑楮一空。公手蹟徧冰天
雪海中矣。二十五年秋。賜環以四五品京堂用。十一月。命署
陝甘總督。會野番肆劫。先飭鎮將防護馬廠。時承平久。營政弛。公
出按邊。命演巨礮。舉營無知者。一老卒能之。公立授以官。士氣爭
奮。尋剿捕番族及漢奸。殆盡。明年授陝西巡撫。關中旱。民不能耕。

爭殺牛以食公曰如此則來歲又饑也飭官爲收牛償其值勸富
民質牛予以息次年乃大有秋二十七年遷雲貴總督滇中漢回
構釁垂數十年焚殺無虛日議者各有所袒莫能決公至諭之曰
止分良莠不分漢回適回民丁燦廷赴京疊控漢民沈正達等有
司提犯解訊保山民糾眾奪犯燬官署搜殺回戶并抗拒鎮道兵
公提兵出勦途次聞趙州之彌渡有客回甸土匪滋事遂就近勦
彌渡破其柵殲匪數百保山民股栗縛犯迎師公召漢回父老各
諭以恩信復乘勢搜獲永昌順甯歷年拒捕戕官諸匪實諸法得
旨加太子太保 賞戴花翎引疾歸滇人繪象以祀家居倡驅
夷議外夷方爲歛迹而當事思中傷之會

聖書召用讒者乃止時方以西洋爲憂後進成就公請方略公曰此易與耳終爲中國患者其俄羅斯乎吾老矣君等當見之然是時俄人未交中國者數十年聞者駭焉公之薨於行臺也易簣時呼星斗南者三年六十有六公服官江南最久以吳民苦賦重講求漕政不遺餘力在粵時

中旨詢江南漕務公條舉四端曰本原曰補救曰本原中之本原曰補救中之補救

宣宗褒許擬俟粵東事畢次第施行

文宗之召公也將使籌畿輔水利卽公前疏所謂本原中之本原者也以

二聖知公之深任公之重以公報國憂民之心一往無所卻顧而卒不果行惜哉然公於政事無所不盡心而其尤關天下治亂之數者則以辦夷務剿粵寇二者爲最鉅而皆齎志以終此海內士大夫下及婦人孺子所繇太息流涕共爲天下惜者也公天性孝友自奉儉而資助戚族歲必數千金尤愛士所至擇其秀異者召入官署勸以學行家居凡族姻中子弟讀書者約期治膳集而課之曰親社性聰察摘伏如神馭左右嚴每黑夜潛行躬自微察無敢因緣爲奸然待人以恕接以誠人咸樂爲之用與人言必令反覆詳盡得達其情道人善孜孜若不及善飲喜弈服官後皆卻弗御好勤動與處數十年者未嘗見其袖手枯坐也咸豐元年滇

撫請祀雲南名宦祠陝撫據輿情入告請建專祠皆報可子汝舟官編修總辦浙江補用道拱樞監察御史

贊曰語有之同言而信信在言前同令而行誠在令外烏虜豈不然哉公所至有殊績牛童馬走樂道其姓名其誠能動物也溫公曷加焉粵海之役能終用公不至此代者必悉反公所爲何耶然公自此名益高齟公者乃其所以不朽公歟而天下則受其敝矣公身繫安危固不僅奉 詔督師之不底其績也噫

曩嘗輯先正事略卽以諸傳爲底本蓋傳成於先也然傳中人
不盡入事略故兩存之

自記

李文恭公別傳

公諱星沅字子湘號石梧湘陰人父疇優貢生桂東縣訓導公天挺魁特總角如成人以遠大自勸勵道光十二年進士選庶吉士授編修明年奏辦院事典四川鄉試十五年分校禮部試

命督學粵東公謂士習端則民風正故必以扶持世教爲舉職粵中人士多健訟劄通省府州縣學籍生員之干訟事者牒以文仍訶其實而理之士風爲肅嚴覈丁胥禁革規費諸名目所頒條教大率以人才經學名義爲急下至細務皆手自屬草吏莫敢舞文秩滿授漢中府知府遷河南糧道歷陝西四川江蘇按察使除江西布政使仍調江蘇當是時

成皇帝識公於詞臣中期練習吏事爲臺閣重臣多歷郡國俾周知利病之原也尋擢陝西巡撫抵任効牧令之尤不職者數人或自乞去固原提督胡公超戰功爲世所指名初裁西安總兵缺議每歲以冬春駐西安如湖南四川提督分駐半年例公謂關中方無事乃汰總兵而移提督轉令東道咽喉半年虛曠於地勢事勢皆不順力持於總督寢之修軍政定疑獄尤深疾吏役詐贓致斃命者手劄行通省愷切深至皆斂手奉法調江蘇巡撫蘇松漕事煩重其大弊尤在大戶小戶之不平公至力圖所以均之於無錫金匱兩縣草地總包總等名刊石示永戒二十六年授雲貴總督時緬甯回匪不靖公亟調官兵分道進腹背擊之首匪馬國海懼

亡走則潛結雲州回馬登宵海連升等劫囚作亂迺西大震公檄諸將迅擊而寬其被脅者不三月事大定捷聞加太子太保賞戴孔雀翎疏劾前迺西道羅天池搽殺過多致眾回寒心滋亂得旨削籍旋調公兩江總督於是公三至江南矣耆老聞公來皆額手相告江南武備弛水師會巡尤不實公撫蘇時已引爲憂至是銳意整飭之奏籌海外水師事宜五則捐俸造蒙衝四十艘爲倡鎮將惲公嚴明泄沓之習一變會俄羅斯商船抵上海圖就地貿易公引例卻回有

詔嘉獎陶文毅之改淮北綱鹽爲票也旣以新章取速效而淮南課額重自銀貴錢賤銷數易虧公謂引滯課絀不盡繇私販而欲

圖補救必以嚴治私販爲首務先後疏奏無慮萬餘言皆得
俞旨褒勉逮公去江南而淮南亦改票並設倉於儀徵爲捷法於
是小販雜出鹺政亦狼戾不可收拾然後知公之先見也先是有
詔令兩江總督轄河務如舊制會河督缺

命公兼攝之乃疏陳河工積弊且言道廳應各駐汛地不得萃處
清江浦有

目察禁二十八年秋江淮海並漲淹民廬萬計公親出籌振撫蒿
目怵心眠食虧損疾大作再乞假乃瀝情請開缺會江南監司有
入對者

上詢及公盡得公積勞成疾狀始得請仍

詔病閒卽詣闕公之以郡守陟監司也 朝廷方嚮用公每之官
不久卽遷擢去地方興革有議擬未行者有創始而未竟者惟撫
秦閱三年督江南及二年故閤綱鉅目悉修舉矜慎刑獄而不爲
煦煦仁鋤奸暴尤力河南多滯獄獄囚有病死者公謂罪死死於
法病死死於官罪非殊死則賊命罪當論死則失刑飭有司速治
獄旣上日親錄之囹圄爲空蜀盜曰國匪挾盜曰刀客久爲民害
公皆盡法懲之禽其尤置重典凶疏用戢其爲江蘇布政使也浙
江方禦島夷戰不利江蘇戒嚴提督陳忠愍陣亡於上海夷船繇
海入江陷丹徒犯江寧敗卒跳集於蘇勢洶洶且內訌蘇人大恐
公白巡撫斬標劫者以徇其潰兵潰勇暫招畱令立功贖罪免滋

擾七月英夷受撫於江寧客兵分起歸伍公卽牒請撤糧臺改爲報銷局節浮費也其督兩江也戶部以連年蠲復絀度支籌實庫爲備豫計於是廷臣條五事以上其大者則漕糧改徵折色入銀京師於奉天陝豫采買以充倉庾下直省有漕督撫議江南財賦甲天下弛張必自是始公疏言州縣兼收折色以錢抵銀本無定價若著爲令而示價於通省則銀價日昂民且重困奏入廷臣猶以爲言再下議公再疏言例價甚輕北方糧貴又水陸運費不貲勢不得不議增而例有明文迥非州縣通融辦法若就州縣分別重輕無論各州縣情形不同卽一州一縣中亦各不同且不能舍戶部定例而轉執州縣之勒價爲準多則輸納不前少則采買不

足此國計之難也。至以漕項應折若干，註明糧冊。糧票畸零細碎，開載既煩，且銀價時有長落。將今日少完，明日復多完乎？歲收時有豐歉，將今歲少取，明歲復多取乎？小民正愁穀賤，兼值銀荒，以有易無，展轉虧折，此民生之難也。至州縣之私改折色，祇以解費爲辭。今若明示折改，則張目而無所顧忌，以公濟私，浮勒必益甚。而糧役之勾串詐混，亦必日出而滋弊多。一名色，卽多一利孔。脂膏朘削，究惟編氓任之。此防州縣浮勒胥吏訛索之難也。奏入，宣廟遣之事遂寢。烏虜棄其所有而取其所無，司馬溫公之諫聖倉也。若乃折眾口而輟成謀，則溫公所不能得之於其君者，而公獨得所請，於是歎。

明良一德之盛遠軼前古而江淮之間不至蕭然煩費者非公孰貽之哉三十年正月

宣宗皇帝升遐疾馳入臨

文宗召對恩諭肫渥公奏言臣病幸少差而母老多疾乞歸養上鑒其誠允之十一月奉欽差大臣督師之

命公入告太夫人卽馳赴粵時粵西羣盜如蝟毛金田賊洪秀全楊秀清等尤橫恣公駐師柳州疏調黔楚兵合剿發縱指示所向克捷時向公榮以宿將爲提督在諸將中爲能戰周公天爵爲巡撫果敢任事公皆開誠以通之金田賊旣竄出據大黃江擾武宣我軍籌進止及駐軍地巡撫持議多異同於是有特簡將軍總統

之請公進次武宣疾已作猶力疾見官吏料簡軍書激厲將士如平時憂心內焚寢至絛懑遂以咸豐元年四月卒於軍年五十有五遺疏入

上嗟悼 優旨嘉慰 賜祭葬 賜白金五百兩治喪 予謚文

恭 賜其母陳太夫人人薨十兩子概桓令服闋後引見飾終之典盛矣公儀表瑰瑋聲如洪鐘爲人整峻篤實識量尤恢遠旣通籍受

兩朝特達之知署豫臬時奉

宣宗手敕命毋失書生本色抵陝撫任諭以勉力認真勿負委任調江蘇疏謝

手敕報曰朕見汝年富才明學優品正甚有厚望於汝汝當體朕用人之苦衷也及命兼司河務

諭曰卿年力甚強勉爲之以副重寄逾年請述職

批荅云朕非不願與卿相晤顧公事繁雜難離本任可暫停其乞病也

手批云一俟痊愈卽來京朕切望之至卿當諒之其受

殊眷皆類此性至孝歲時祭祀哀慕不自勝宦遠方太夫人以春秋高恆不就養公廬思輒至不寐洎陳情得請償所願不圖時事之棘惟艱惟瘁遽殞其身此公遭疏所以憾賊之不平與養之不終也所著有芋香山館全集若干卷子五杭宮編修有學行早卒

概鹽運使銜候選道桓廩生江西布政使署巡撫

贊曰嶺西盜起

詔林文忠出視師道卒特詔公代之未數月卒賊遂不可制越
十三年乃爲曾文正所滅賊蓋與楚人終始也異哉公少有異徵
應童子試時外舅郭進士汪燦夢入公府見金冊列公姓名爵里
物色之妻以女旣館選諸姊中有召紫姑神者戲問公終身官秩
皆不爽末署蒼梧懷節卒薨於梧州之武宣蓋前定云

江忠烈公別傳

公諱忠源字岷樵湖南新甯人爲諸生究心經世學不屑屑章句充道光丁酉拔貢是科舉於鄉甲辰大挑得教職新甯地接廣西民犷雜處多盜公倡行團練法以兵法部勒子弟是爲湖南治鄉兵之始丁未秋犷匪雷再浩勾廣西賊爲亂鹽法道楊君炳堃總兵英君俊來縣會勦議徵兵公力止之自率鄉兵擣其巢再浩擒是爲團練殺賊之始事定賞藍翎以知縣用戊申謁選發浙江權知秀水邑被水災公勸分設賑收棄孩蠲正賦民忘其災計擒劇盜十數邑大治巡撫吳文節公待以國士補麗水會

上登極詔中外各舉所知侍郎曾公具疏薦有

旨召見吳公疏畱辦海塘工。閏四月工訖，以父憂歸。時廣西賊首洪秀全、楊秀清等稔亂，朝命大學士賽公出視師。聞公知兵，疏調軍前。副都統烏蘭泰公忠勇負氣，與他將多齟齬。一見公，深相倚重。公募故所用鄉兵五百人，使弟忠濟帥以來。號楚勇，是爲湖南鄉兵。出境殺賊，之始始至，敝衣槁項，諸軍皆匿笑。時賊氛惡甚，官軍數萬莫敢撓。公築壘逼賊營，賊以其少，且新集，易與也。急犯之。公堅壁，如不敢戰。賊近塹，始開壁馳之，斬首數百。烏公拊掌語人曰：「君等蔑視楚勇，今何如？」侍衛開隆阿者，善射，奇中。嘗射虎十數，軍中號「打虎將者也」。公長揖過之，意謙。公一日戰被圍，矢且盡。公登高阜望之，曰：「必開公也。」怒馬馳救之，並轡歸。開公拜曰：「活開

隆阿者君也。遂握手飲，極歡。累功擢同知直隸州。賞花翎時，賊萃永安，官軍環之。闕城北一面，公與烏公請掘長濠，聚礮之。弗聽。明年春，以病歸。賊果由北路犯桂林，四總兵陣歿。烏公中礮亡，公出私財增募千人，與劉公長佑赴援。至則都統已前卒，城圍逾月。公進扼東岸之鷓鴣洲，三戰皆捷。四月朔，桂林圍解。擢知府。賊趨全州，公間道敗之。唐家司全州既陷，賊銳意趨湖南。公先諸軍扼富塘埔，賊度不能越，則悉載輜重舟中。期水陸並下，公伐樹塞河，截賊褰衣渡。鏖戰兩晝夜，逆舟拄樹不得前。僞南王馮雲山中礮死，盡獲其輜重。賊遂東走道州。初，公慮東岸虛空，白當事請分兵扼截。弗許。請躬率所部往，又弗許。至是，賊果由東岸竄湖南矣。賊

之踞道州也。眾不滿萬。公慮日久。裹脇眾。乃建議分防。不如合剿。遠堵不如近攻。七月。賊自藍山嘉禾犯桂陽。旋陷郴州。公上言。後路追剿愈急。前路攻陷愈多。請仍申合剿議。當事皆漫不省。賊則益張。公在郴州。約總兵和春。公由石子嶺潛師出賊前。未至賊竄永興。以萬眾畱郴。相牽制。公策永興賊必繇茶陵醴陵犯長沙。乃倍道繇衡州。援省會賊已踞城南及小西門。窟穴於民廛。攻甚急。南門外天心閣地勢高。賊方棚其上。公望見。驚曰。賊據此。長沙危矣。急帥所部爭之死傷二十人。督戰益力。賊敗退。趣移壘。去賊數十武。共汲一井。擊析聲相聞。自是長沙止。南門受敵。賊巢背水面。城當絕地。雖後隊踵至。無能爲矣。會僞西王蕭朝貴中礮死。賊

數竄地道先後爲副將鄧君紹良瞿君騰龍所拒氣少阻逾旬洪
楊大隊至勢燄復張公弟忠濟自郴尾之約公夾擊方戰賊伏叢
冢間挺矛刺公傷腓墜馬遇救免時新撫張公至前巡撫駱公與
幫辦軍務前湖北巡撫羅公均夙器公就詢方略公以官軍四面
集惟河西一路虛請調重兵駐龍迴塘扼賊竄路期盡殲張公尤
韙之而河西諸將遂巡莫敢前當是時寶公罷免新帥徐公久不
至城內外巡撫三提督二總兵十莫相統攝謀用不成公憤甚躬
赴湘潭力請於徐帥不省賊卒由龍迴塘竄出掠舟西渡而東南
大局隳矣十一月公追賊至臨資口屬巴陵土寇起檄公畱期事
平而瀏陽匪渠周國虞等故與粵西賊共爲耶會眾萬餘人粵賊

至卽起應之已復止當事姑掩覆之至是將乘官軍之下爲亂湖南公出不意進討張示散脅從許自首免誅賊來犯設伏敗之斬首七百首免者萬人瀏陽平公時以援湖南功擢巡守道矣三年正月張公權湖廣總督疏調公旋授湖北按察使時賊棄武昌東下公私掃地一切倚公辦又平民之起爲賊者通城劉立簡崇陽陳百斗嘉魚熊開宇等有眾數千皆討平之遂奉幫辦江南軍務之命公拜疏言軍事請嚴軍法撤提鎮汰弁兵明賞罰戒浪戰察地勢嚴約束寬脅從凡五千餘言

上嘉納之是爲公通籌天下大局之始四月公帥軍東下廣濟賊宋關祐等抗糧爲亂戍守令聚眾數萬公就便征之戰三捷斬首

五百有奇生擒百人釋其半令轉相解散詰旦賊大至又敗之訊
俘多卽釋歸者乃駢誅之五月至九江賊自皖江沂流上距城四
十里憚公威名不敢近改由彭蠡犯南昌時公奉命援鳳潁卽
抗疏改道援江西軍士方患暑疫汰之得人千三百以五月十六
夜抵南昌凡三晝夜行五百里賊不意公乍至驚曰來何速也章
江門最受敵公自當之宿譙樓藝城外民舍十八日賊舟蔽江至
薄城礮擊之稍卻趨德勝門以門外民居阻雨未盡焚也方賊至
營兵四人將縋城走公立斬以徇曉夜躬巡礮碎從者首不爲動
賊穴地轟城公鑿隧道迎之三次藥發陷城各十餘丈公及弟忠
濟力拒之賊死傷山積不能入

上頒賜玉翎管及挾拾各二時湖南北援師先後集賊氣阻圖竄
吉安臨江而安福泰和萬安寇復起公乃分軍樟樹鎮扼賊衝檄
羅君澤南等剿泰和各屬平之時羅君方以訓導援江西也八月
二十二日圍解

天子加公二品服當是時公義聲震天下師及德安聞賊上犯公
急往助守田家鎮以二千人渡江而令後至者聞道趨武昌備緩
急時司防者武昌道徐君豐玉漢黃道張君汝瀛用戰艦扼江而
南岸半壁山不設備公至謁之急揮兵據險賊已先我至水陸交
訖師遂潰公至甫一日也徐張二公死之黃州漢陽陷惟武昌以
公援應得全賊患公躡其後尋引去初公以田鎮之失鐫四級至

是奉

命巡撫安徽公疏請增兵萬人當一路又念行省新改廬州爲南北樞紐去稍遲賊且北竄遂以二千人先發而湖北巡撫某強留公所遣援軍公於是益孤矣抵六安適舒桐告陷士民遮道留公公病入城繕守備人心稍定廬州警報日夕至知府某具言城中軍實裕團丁可萬人請速往公乃畱千人守六安自率數百人入城知府來謁公詢守具糧糧軍火一無有公審其有異志擬誅之未果越二日賊大至團丁鳥獸散公力疾登陴誓死守城周十數里台主客兵裁三千賊仍用地雷轟大西門月城繼轟文昌門公親督楚勇殊死鬪殲賊數百人疏陳守禦狀

上特賞公霍隆武巴圖魯名號賊自十一月十二日合圍公堅守逾月賊奪氣將遁矣有內奸以城中食乏軍火且盡告遂增闕隧道以十二月十七日昧爽併力攻逾時水西門城塌十餘丈公且戰且修築忽傳賊自南門緣梯入人聲鼎沸公知事不濟掣佩刀自刎左右持之一僕負公行公不可則嚙其肩及耳血淋漓僕創甚委公於地賊逼公轉戰至水關橋被七創墮橋下死之同殉者同知鄒君漢勳參將馬君良勳自六安從公入城者也參將戴君文瀾縣丞艾君延暉自湖北來援乘間入者也布政使劉君裕鈐池州知府陳君源充同知胡君子雖副將松安縣丞興福二君皆死而知府竟降賊前以城中虛實告及置梯南門皆其勇目所爲

也公因孤城時援師十餘壁皆不能前十二月十二日公弟忠潛自湖南募楚師來援與劉君長佑殊死戰不利及再戰而城陷矣後八日舊卒周昌發冒死入城負屍出面如生事聞

上震悼追贈總督予諡忠烈賜祭葬

命廬州及湖南江西各建專祠公性英烈見義必爲成敗死生無所惑治軍推赤心待人得其死力所過無秋毫犯每戰親陷陣陣厲風發誓不與賊俱生尤料敵如神能以少擊至眾所向有功公薨海內識與不識下及婦人孺子皆爲流涕祠祀遍江以北五年援賊屯大蜀山上有公祠夜見列炬熒熒劍槊聲相摩賊驚遁祠得全喪歸柩尙在城別賊自東安犯新甯攻七晝夜敗去訊賊

黨具言酣戰時見監旂軍突出遂不支藍旂者公部向所用旂時
實無此軍也世或謂公靈不昧雖死猶殛賊云公年四十有二父
上景歲貢生母陳夫人昆弟四公長次忠潛累官廣西布政使次
忠濟記名道陣歿通城次忠淑累擢知府于二孝椿以忠潛子嗣
孝棠遺腹生同治癸酉拔貢

贊曰盜起嶺西崙蠻耳王師且十萬環視莫敢先公以書生倡勇
敢軍氣爲一變其後楚軍輩出功在東南皆公風聲所起也公薨
後二年

上猶下其疏軍中

上之知公深矣公嘗建三省會勘議請治舟師扼上游侍郎曾公

卒用此肅清江面。烏虜公存亡實關天下安危。豈僅以一死激頑懦哉。江西危於公無責聞警拔舍行臥病六安。以數百人入廬州。皆智巧士所目笑者。而汜以是死。悲夫。公試禮部時。同年生武岡曾如礮。暨湘鄉鄧鶴齡。陝西鄒興愚。先後客死京師。貧不能反葬。公皆身護其櫬歸。嘻。此其一節耳。然赴義若渴。已可見其概云。

塔忠武公別傳

公諱塔齊布字智亭姓托爾佳氏滿洲鑲黃旗人生而神識沈毅都統烏蘭泰公夙器之由火器營護軍擢三等侍衛咸豐元年發湖南以都司用二年秋賊犯長沙以守城功擢游擊賞藍翎署中軍參將時在籍侍郎曾公國藩奉命督治鄉兵用明戚繼光法訓練束伍每校閱公必短後衣躡屨帶刀侍會公與語奇之試所轄兵皆精練副將清德方忌公嗾提督將加摧辱曾公乃劾罷副將薦公忠勇可大用且云塔齊布將來如出戰不力臣甘與同罪得旨加副將銜三年勦茶陵安仁土匪賞換花翎記名以副將用四年二月帥所部由平江進勦湖北通城崇陽賊會官軍

失利岳州賊乘勝上犯會侍郎水師退保省河公隨有湘潭之捷
公之勦湘潭也始至次高嶺賊卽奄至公手大旗麾軍士縱擊斬
僞先鋒元帥九人賊敗潰逐北數里至城下明日賊大出犯公伏
兵山左右設礮三重誘之及賊逼礮斃以百數賊大亂伏起夾擊
之賊奪路走僵屍相枕籍遂薄城闔殪悍賊數百公深入幾中伏
跳而免麾兵鏖鬥大破之城北賊柵皆盡其南則水師會勦焚賊
舟數千并焚市廛使城外賊無所止火光燭天三日夜浮屍蔽江
下其時領水師者楊公岳斌彭公玉麟及楮觀察汝航夏同知鑾
也四月四日賊棄城夜遁凡八日湘潭平詔加公總兵銜賞
喀屯巴圖魯名號命署湖南提督未幾卽眞先是提督鮑起豹

以清德之譖屢斥辱公。至是起豹罷公代其位。軍民快之。時敗賊猶駐岳州。分黨陷常澧。公馳抵新牆。破土城三。舟師亦敗賊。雷公湖又敗之。道林磯公與羅忠節澤南李忠武續賓合軍攻岳州。敗賊於高橋。閏七月二日盡破賊壘。賊棄城退踞城陵磯。未幾賊舍舟登陸。將據險爲營。分三路來撲。公亦分三路擊之。賊抵死抗拒。良久始敗潰。追至擂鼓臺。殲賊八百有奇。公臨陣好匹馬衝鋒。戒從者弗從。從亦無能及者。尤好單騎薄賊壘。覘虛實。瀕危得免。有天幸。一日攜親卒四人進覘。擂鼓臺突遇悍酋獅鬚睥目。直呼公名。橫矛刺其馬。欲擒公。親卒黃名魁躍起刺酋墜馬。酋回刺名魁。傷右脇。公親刃酋殪之。獲賊旗。知爲僞丞相曾天養。天養驍桀爲

賊魁自楊秀清以外皆爲之下伏誅後賊黨爲之茹齋六日者也。賊旣失悍酋奪氣退踞武昌。公與羅公自臨湘進剿長安驛羊樓峯佛嶺大沙坪等處。戰屢捷。復崇陽蒲圻咸寧。又敗賊於官步橋。及徐李埔。遂與羅公進屯江夏之紫坊。初曾公在城陵磯約諸軍會紫坊。至是召諸將議攻取武昌策。定議羅公帥師攻花園賊壘。水師扼長江。公從油坊嶺趨扼洪山。山在武昌城東北。左近梁子湖。右隔湯孫湖。係絕地。爲竄賊所必經。時城賊恐懼。以八月二十三日啟東北門遁。公扼而截之。賊路斷。迎斬黃衣賊目數名。賊崩奔。悉趨山背。復麾軍圍逼於沙湖塘角。賊爭赴水死。填尸幾滿。中多幼孩。公見之大哭。傳令拯救。得二百有奇。羣賊因而乞命者。

又七百有奇。分別誅釋之。武昌既復。進攻大治。戰五里牌。斬黃衣騎馬賊。賊大奔。燔賊壘二。亡何賊反。鬥伏突起。刺傷公坐馬。左右兩軍合擊賊。復大潰。爭橋渡。橋斷。多墜水死。生擒百二十四人。是日羅公有興國之捷。於是兩軍會於興國。籌進取。羅公西擣半壁山。公東勦富池口。十月二日。戰軍山背。克之。屯其地。距羅軍十餘里。中隔小河。方造浮梁。濟忽出賊千餘。遏渡處。別賊數千。陳半壁山左右。與羅公大戰。公隔河爲聲援。賊大敗。旣又繇富池口沿岸上翼襲我軍。後公擊走之。浮梁成。初五日。田鎮賊渡江來犯。公與羅公夾擊之。殪賊數百。溺斃半之。時賊所設橫江鐵鎖在南岸者。已斷。而北岸猶未破。十三日。水師大戰。公及羅公列陣半壁山。護

之燭逆舟數千北岸鐵鎖燬賊遁竄廣濟黃梅田鎮既克賞
黃馬褂予騎都尉世職二十日公及羅公渡江繞至蘄州及賊於
蓮花橋遇伏我前隊稍卻公匹馬突陣手刃大旗賊追奔數十里
遂復廣濟而黃梅爲賊必爭地悍酋秦曰綱陳玉成羅大綱併力
守之以數萬賊分布小池口孔壠驛而立堅壘五於大河浦龍頭
寨等處嚴密埒田鎮十一月朔師次雙城驛賊數路來犯公與羅
公併擊之追奔十里破壘五斃賊三千餘生擒九十餘越日進次
下新橋距城四里公與羅公登山望知北門可攻遂親進擣我兵
肉薄而登多受創公被石傷首流血被面督戰益厲卒克黃梅會
公疏陳戰狀有詔戒公輕進公讀之感泣尋攻孔壠驛驛南通

小池口東臨水賊於西南北築土城公從西南路進攻累肩爲梯
卓矛而躍遂大破之賊悉竄小池口分黨奔湖口與九江相犄角
爲死守計公遂與羅公渡江攻潯城十二月朔攻西南門不下驍
將童添雲死之會水師被賊襲喪失輜重而賊僱率從江北接濟
羅公從二套口渡江進攻小池口公帥壯士二十人渡江督戰以
眾寡不敵敗且戰且退公匹馬衝突爲諸營扞蔽有黃衣賊酋三
人策馬來犯公以套馬竿圍一酋頸斬之且奪其馬餘賊皆靡公
俟大隊沿江上單騎馳入鄉間馬陷泥淖中幾失道有田父匿匿
其家時除夕前一日也次日各軍以公未歸營洶洶失所倚有泣
者夜三鼓鄉民忽送公渡江歸會公羅公皆躍起跣而出握手相

勞苦繼以泣公談笑自若曰飢甚速具飯啖我時合營皆驚喜歡聲如雷飯罷已元旦矣五年正月六日城賊出犯公擊斃二百有奇生擒二十有一公令暗伏地雷誘賊來撲而陷之果斃百餘賊其後戰屢捷而城終不下六月曾公與公約會於青山曾公謂宜移師東渡勦湖口及東流建德長驅直下公誓力破此城七月十八日傳令攻城忽患氣脫日中卒於軍年三十有九事聞上震悼照將軍例賜卹陰襲如例許入城治喪賜祭葬予諡忠武公長身火色居平粥粥若無能及臨陣奮拳切齒口流沫若欲生啖賊者所乘鐵驪絕有力湘潭之捷殪賊酋所得也每戰不令士卒出已前他軍被圍或小卻必驟馬馳救背負火鎗一腰刀二

手長矛及套馬竿各一技皆精絕無虛發每逼賊壘覘形勢比賊覺去已遠賊中驚以爲神而公雍容恬退未嘗一自詡也天性忠孝自擢提督於左臂涅忠心報國字左右嘗以海燕窩進公愀然曰吾母夫人在都不知能給朝夕否忍甘此耶深夜呼親卒與絮語家事每至泣下偏裨小校直入內幄白事不俟傳宣治軍紀律嚴秋毫無所犯與最下卒同甘苦德化令進莞席以士卒皆臥草土卻之及薨軍民逾時悲泣喪車過南昌所乘馬服鞍轡隨行將入城忽滿身汗涇人謂公靈寶乘之云湖南江西及九江湘潭均奉旨建專祠公娶于氏生女一無子以弟子永承嗣而其弟莽阿布先一年戰死獨流軍中

贊曰方賊踞湘潭時挾百勝之勢官軍莫敢撓其鋒旣得湘潭長沙不攻自困且將沂湘源以達粵西老巢直下通金陵首尾一江相貫注微公及水師血戰數晝夜力摧其身距天下事尚可爲哉然公是時所部千三百人耳使天假公年平賊當可日月計顧以暴路行聞久賁志卒軍此朝野官民所繇同聲一哭爲公悲且爲天下生民悲也公卒後十年江寧拔賊平公庶幾拊髀於九原也夫

羅忠節公別傳

公諱澤南字仲嶽號羅山湘鄉人幼穎悟十歲能文家酷貧溺苦於學夜無油把卷讀月下倦卽露宿達旦年十九喪母明年大父及兄嫂歿二十九長次子及三子皆殤是歲爲道光乙未大旱饑疫作公罷試徒步歸夜半斂門則其妻方以哭子喪明時飢甚索米爲炊無有也已亥補縣學生年三十有三矣又八年始食廩餼公自少篤志正學好儒先性理書賀制軍長齡唐太常鑑皆重之制軍延課其子咸豐元年詔舉孝廉方正當事以公應二年粵逆犯長沙縣令屬公練丁設防號湘勇明年侍郎曾公奉命督治國防江西上猶土匪竄桂東檄公進剿行次衡山忽草市寇起

眾千餘公禽首逆劉積厚等進擊桂東賊走之時粵寇圍南昌公帥湘勇赴援既至土賊陷泰和安福圍吉安公與劉公長佑往援剿賊解圍遁公追至安福復縣城日夕賊大至敗之明日又至我軍鏖戰斬賊無數敗賊竄入湖南巡撫駱公秉章檄公回剿賊尋遁會永興土寇亂會侍郎檄公往剿戰於油榨墟平之公初以湘勇三百破安福賊數千與李公續賓分典中右營共七百人至是增至千人屯衡州再平草市土寇斬首逆王大漢四年夏湘潭賊退公與提督塔忠武公會師東下六月攻岳州公以大橋路爲賊所必爭帥所部扼橋守三戰皆捷殲賊千閏七月二日破高橋賊壘九賊退踞城陵磯公與塔公乘勝進擊連破賊營三賊宵遁是

役也。公獨當大橋一面，功最偉。云：尋自臨湘進屯長安驛，賊分四路來犯。公令偃旂息鼓，乘間突起擊之，賊大潰。又破賊羊樓崗，追至百花嶺，再破之。佛嶺進次虎爪市，連破桂口、大沙坪賊壘，復崇陽。時武昌賊分黨由金牛入咸甯，公擊走之，追敗之。官步橋又敗之。金牛遂進壁江夏之紫坊，始會公約諸君會紫坊。及是召諸將至金口，議攻武昌。策公出所續圖，言紫坊出武昌有二道：一洪山大路，一沿江出花園。當以重兵剿花園，而分兵扼洪山，防反竄。諸將未決。公請身任其難，遂自攻花園，而令塔公出洪山。時花園悍賊萬餘，築堅壘一枕大江，一瀕青林湖，一跨長堤深溝，堅柵列巨礮爲固。八月二十一日，官軍水陸進攻，公直趨花園。賊憑木城轟

拒我軍伏地進分兵奪賊舟數十舟賊退營賊亦亂乘勢踰溝摩其壘同時並下翼日攻鮎魚套賊營川勇卻公擊賊隄上隔溪不能救街口賊乘機出逼公奮擊敗之李公由江岸回援又大敗之賊竄洪山爲塔公所搏是夕棄城遁二十三日武漢城皆復距會議時七日耳鄂城之克實本公謀也九月師出金牛敗賊於沿埠頭克興國塔公復武昌大治遂規取田家鎮鎮居大江北岸其南爲半壁山舊設防兵陷於賊賊更爲鐵鎖以截水師而用重兵屯半壁夾江以守十月朔公擣半壁賊數路來犯公策馬衝陣賊敗走江干燹之墮水死者千初四日塔公造浮橋渡小河爲賊所遏賊自半壁傾巢出北岸賊渡江助戰者萬人僞王坐將臺督戰龍

旂黃蓋勢張甚時公所部勵二千六百人眾色沮有潛遁者李公
飛騎追三卒回手刃之軍心乃定公令堅伏弗動度賊銳已竭突
起急攻賊大潰奔半壁山而後路爲我軍所扼不得上皆觸石墜
崖死凡數千水師亦蔽江下斷樁江鐵鎖燔賊舟數千火光夜照
數十里水陸夾擊田鎮平尋渡江次菩提埧塔公已先至兩次伏
賊起皆擊敗之擒斬千三百遂復廣濟十一月進軍雙城驛賊扼
險而營一鼓登山平其壘抵黃梅與塔公奪柵入縱火攻之城復
遂進軍濁港遇悍賊解衣出戰堆積市肆間公焚之斬馘千餘餘
賊退保孔壠驛賊酋羅大綱復從湖口率萬人至公分兵抄襲街
口賊賊敗歸壘攻破之大綱逸去是役以五千人破賊二萬賊遂

盡撤沿江各營併力守九江矣。塔公渡江圍潯城。公別勦盩山。遏湖口上援之。賊攻梅家洲賊壘不下。會水軍自湖口入彭蠡。盡燬賊艘。賊亦潛以小舟縱火襲我外江輜重船。水師潰。公回駐九江。會北岸小池口有賊。公與李公率勇千四百人進勦。塔公往助之。渡江賊大至。刃旣接。我前軍卻。公急歛兵歸。時十二月二十九日也。五年正月。北岸賊由黃梅廣濟上犯武昌。復失。會侍郎入南昌。別賊由浮梁陷饒州及弋陽。檄公往援勦。時公所部三營。李公將左。蔣君益。澧將右。公自將中營。唐君訓。方劉君希洛各率勇從之。三月大戰五里亭。克弋陽。賊隨陷廣信。公壁城西烏石山。賊三路來犯。公方築壘。不爲動。俟其疲乏。乘之大獲。翼日賊復大至。見我

軍不動亦不敢前相持兩時許忽起乘賊大敗之遂四面薄城賊
啟東門遁初賊驟至民不及避殺戮甚慘公至不三日復其城士
民歡躍焚香遮道迎遂復德興及景德鎮未幾有進勦義寧之役
七月次梁口賊分兩路來拒我軍三伏以待之賊潰伏兵從山後
出賊之抄我後者我軍反蹴其後斃賊六七百人越日進駐棋盤
嶺以鼃嶺爲州城屏蔽急據之嶺距州七里左曰鳳凰山其右最
高者曰雞鳴峰峰下卽西門擺百貨所輳也軍據此全城在目矣
十四日大戰殪賊六七千賊奪氣閉城不出次日復戰又敗之盡
焚濱江賊壘是夕賊棄城遁義寧旣克公上書曾侍郎其略曰武
昌居吳楚上游九江爲豫章門戶今皆爲賊據崇通等處羣盜出

沒江西之義寧武寧湖南之平江臨湘均無安枕曰欲克九江必
繇武漢下欲克武昌必自崇通入曾公因奏派公回援武漢而以
彭君三元普君承堯所部寶勇隸之九月進攻通城悍賊萬餘人
見官軍至突出薄之公令軍士席地坐無譁待賊逼大呼奮擊斬
賊將三人乃崩潰明日破城外三營奪門入克之尋進攻桂口令
會攻通城之李原潛何忠駿等率平江勇駐守而自率所部克崇
陽尋以分兵攻梯木山有濠頭堡之敗公整軍再戰復大捷進攻
蒲圻克之遂復咸寧自是武昌以南無賊蹤而逆渠石達開自崇
陽乘虛入義寧江西賊勢日棘矣十一月師抵紫坊與巡撫胡文
忠會合又會提督楊公岳斌於金口商進取策定議公率湘勇從

東路壁洪山胡公從中路壁城南隄上而令九溪營屯金口爲水師犄角時賊於武昌城外築堅壘十三高者與城埒公至方修壘胡公亦始至悍賊二萬從十字街出胡公擊卻之數卻數至公與李公潛師出寶湖隄分兩路繞抄胡公所部見湘勇至佯敗走賊追之旋反擊則公等已抄出堅壘北遂破十字街營盡殲追賊無脫者於是賊皆絕城入盡毀城東南賊壘造浮橋於鮎魚套進攻八步街以奇兵逼望山門襲賊壘後立平之於是西路賊壘亦盡尋攻塘角賊營毀漢陽門外一壘焚其船廩殲賊千城賊由竇出截我軍後路公與李公夾擊之又殺賊數百環西北城賊壘皆盡是夜賊於望山門外葺石壘二高與城等我軍蹋平之李公出窺

灣截賊餉道賊七八千人由塘角沿湖下抄其後公令劉君騰鴻等出洪山之東自率中營出洪山之西夾擊之殄賊千餘賊自此閉城不復出六年正月公率中營移屯洪山絕頂後右各營壁南岡賊乘夜襲中營摩壘矣我軍築石投之登者皆殪嗣是每夕輒至公設伏痛殲斬首四百賊始不敢復襲營二月公分軍扼黛灣賊出爭大戰小龜山斬級六七百遂以二營駐其地明日賊由武勝門出萬餘人與我軍戰隄上殲賊數百公追至城下繞城審視賊不敢出二十九日夜有大星隕於西北三月朔大霧次日城賊出公親搏戰走之已而賊窺我守壘兵少大舉來犯公追賊至城下賊礮如雨中公右額裹創戰逾時歸而創劇日夜危坐不寐越

三日病甚不能起語喃喃皆時事口占忠義祠楹聯使人書之怒
開目索紙筆仰臥書曰亂極時站得定纔是有用之學初八日晨
起汗出如瀋握胡文忠手曰武漢未克江西復危不能兩顧死何
足惜恨事未了耳其與迪菴好爲之迪菴李忠武字也語畢而瞑
年四十有九公貌樸氣沈究心濂洛之書通知世務期見諸施行
在軍毅然以滅賊自任所部將弁皆其鄉黨信從者前後克城二
十大小二百餘戰其臨陣以堅忍勝如其爲學或問制敵之道曰
無他大學知止數語盡之矣左氏再衰三竭之言其注腳也公初
以團練敘訓導晉知縣平安福晉直隸州知州克岳州擢知府
賞戴孔雀翎武漢克復授浙江甯紹台道以田鎮戰功加按察使

銜克廣濟黃梅 賞葉普鏗額巴圖魯號凡勇號多由外請此出
特恩異數也義寧之役加布政使銜死事狀上 優旨照巡撫
陣亡例 賜卹父嘉旦 賞頭品頂戴子兆作兆升並 賞舉人
詔湖南湖北江西各建專祠 賜祭葬 予諡忠節同治元年
詔湖南巡撫遣官卽家 賜祭一壇三年克復江寧 特旨加
雲騎尉世職所著小學韻語一卷詩文集八卷周易附說讀孟子
劄記西銘講義人極衍義 皇輿要覽皆行於世

贊曰 國朝武功邁前古所用皆八旗東三省勁旅及各直省綠
旗兵嘉慶初平川楚教匪始兼用鄉勇然十裁二三耳迨粵寇起
而楚勇湘勇名天下楚勇自江忠烈始公以老諸生帥湘勇轉戰

大江南北往輒有功所繇與忠烈江公同張大國楚也哉雖然公
以戰績顯時會使然耳公邃於洛閩之學淵乎莫測其際也世所
傾慕者抑猶其外見之一端歟

李忠武公別傳

公諱續賓字迪庵湖南湘鄉人沈毅寡言笑身長七尺膂力過人習騎射能挽三石弓羅忠節公講學里中公折節受學咸豐三年忠節募勇殺賊公秉父命往佐之所練鄉兵號湘勇從平桂東土匪未幾從忠節往援江西公佐謝君邦翰將右營邦翰邑諸生故忠節弟子抵江西戰死公代將其營所稱湘右營者也會土寇陷泰和安福圍吉安遂同解吉安圍泰和安福賊皆敗潰復馳勦永新事平敘從九品師旋假歸甫三日趨衡州尋勦賊油榨墟進復永興次郴州敘功晉縣丞初公所部僅三百六十人至是巡撫駱公命增爲五百人明年駐衡州平常甯土匪時湘潭賊敗竄會公

統水陸軍東下。檄湘勇從。六月抵岳州。壁大橋。時湘軍兩營才千人。分防八路。賊日夜來犯。提督塔忠武約會攻賊巢。兵始交。我軍小卻。賊追騎大至。公左右止數人。戒曰。毋走。徐行陟山岡。賊不敢逼。已而我軍漸集。公親搏戰。斬大旗賊數人。餘賊爭登山。公曰。是可取也。手劍策馬大呼而進。斬賊目一人。奪其旗。追北十餘里。明日塔公至營。指所部贊曰。壯士壯士。與公語良久。嘆曰。名將也。公自隨羅忠節從軍。循循弟子列。至是始以知兵聞。時官軍日與賊戰。斬馘數千。公語塔公曰。連旬戰。賊不得擄掠食。且盡。可乘機薄其壘。明日遂進兵。風雨驟至。眾欲退。公曰。天助我也。與塔公並轡督戰。頃刻破數十壘。岳州平。擢知縣。賞戴藍翎。八月同羅公克。

崇陽咸寧進規武昌二十一日破花園堅壘及鮎魚套賊營明日克武漢語在羅忠節傳公擢直隸州知州賞花翎九月同克興國州擒僞進士胡萬智斬之十月進攻半壁山時南北兩岸賊無慮十萬鐵鎖橫江賊舟廬聚數十里塔公師抵富池口阻浮橋不克濟湘勇及寶勇才二千六百人軍士多失色逃者三人公飛騎追還揮淚斬之軍心乃固逾日大戰殺賊數千赭其巢遂破田家鎮擢知府賞摯勇巴圖魯名號授安慶知府當是時公知兵之名震天下初陸師分南北進勦楊制軍需勦北岸公隨塔公羅公勦南岸曾公督水師循江下僞丞相羅大綱守廣濟黃梅設卡壘數十田鎮破後僞燕王秦曰綱檢點陳玉成皆往附之勢張甚總

督不能前。塔羅兩公乃渡江北。勦公率爲軍鋒。每攻壘。與塔公逼賊壘十數丈。席地坐。礮彈雨下。談笑自若。忽躍起曰。進則橫厲無前。當者輒糜碎。遂復廣濟及黃梅。敗賊濯港。再敗賊孔壠。驛抵湖口。敗賊梅家洲。知九江未可驟下。從羅公移營盍山。十二月水師陷入彭蠡湖。外江失利。小池口賊勢復張。湘軍退屯九江。公憤甚。請於曾公。自率千餘人。以歲除前一日渡江。攻小池口。僞城塔公率二十人偕往。因眾寡懸殊。戰不克。比暮始收隊。而塔公獨未返。公涕泣不食。誓渡江再決死戰。明日塔公竟覓舟返。無恙。時除夕三鼓矣。明年二月武昌復陷。賊之從江北上竄也。公知北岸官軍不能敵。建議分南北兩軍夾江而勦。令塔公益募勇三千合潯軍。

五千專勦南岸別令羅公率軍三千益募勇五千勦北岸南北各
自爲戰一圖安慶一圖金陵庶大局克有濟曾公韙其言以餉絀
不果亡何曾公入江西饒廣告急檄湘軍援饒三月偕羅公進勦
敗賊大水橋復弋陽城賊趨陷廣信迫擊之三日而城復移軍景
德鎮會義寧州陷江省大震七月進攻義寧奪鰲嶺要隘賊棄州
城遁語並詳羅公傳得旨記名以守巡道用八月同羅公回援
武漢克通城崇陽而岳州警報忽至公分兵趨蒲圻之羊樓崗會
李君杏春彭君三元戰死崇陽之濠頭堡眾譏馳救公曰死者無
及矣生者必來歸賊乘勝遠鬪利速戰宜堅守以持之俟其疲乃
可擊也明日賊至我軍憑壘固守比暮賊將休公揮眾突之賊大

潰追北至蒲圻復其城並復咸寧詔加公鹽運使銜帥師趨武

昌壁洪山十二月破塘角賊壘分壁小龜山六年二月與劉公騰

鴻扼窯灣斬馘數千屢戰皆捷亡何羅公中礮卒當是時軍中新

失大帥人情洶洶賊乘機築壘保安門外礮子及五里墩大營湖

北巡撫胡公奏以公總統諸軍公涕泣受命遂掃平保安門賊壘

而江西瑞臨撫建等郡賊蔓延北及崇通蒲咸西及瑞昌皆陷賊

乃分湘勇四千屬曾公國華劉公騰鴻等由咸寧進剿賊訶知之

屢出城來犯公敗之賽湖隄又敗之小龜山雙鳳山秋七月僞翼

王石達開率援賊大至城賊將應之公分兵駐魯家港防援賊遣

壯士數百人執所奪黃旗誘城賊賊信爲援至出城夾擊伏起礮

賊過半及援賊既至禦之魯家港鏖戰三日城賊鑑前失疑懼不敢出援賊遂敗奔追至小龜山斬首八百別將與城賊鏖鬪資湖隄公帥師援之賊望其旂幟走入城自是堅閉不出公募民夫開濠掘江水入湖爲長圍斷賊接濟賊益困十一月二十一日克武昌得旨以按察使用尋分兵復武昌縣渡江克黃州旋克大冶興國遂直搗九江林啟榮者賊中最悍酋也前歲塔公圍攻時堅守弗下至是仍率眾死守夜無更柝望火城以內人聲寂然官軍潛薄之鎗礮應聲下七年正月公用攻武昌法闕濠困之閱數月濠成四月皖賊上犯號十萬犯蘄州及黃梅羅田公分兵援蘄州賊稍退六月賊傾巢上犯蘄黃告急賊於廣濟童司牌築壘伺我

軍公渡江勦平之。八月破小池口僞城，仍回九江。先是四年秋，賊奪江西戰艦，沈塞湖口。築壘石鐘山，爲浮梁鐵鎖，阻官軍隔岸。梅家洲壘僞城，環巨礮。我軍仰攻不利。其年十二月，水師陷入內湖。曾公益治水軍，章門檄彭公玉麟統之。水軍復振。至是袁吉瑞臨以次復。眾議會勦九江。公謂不拔湖口，九江不可得也。乃定計水陸夾攻湖口。九月八日，公遣其弟續宜率馬步軍攻梅家洲僞城。躬率師揚言勦宿松，漏四下迂道八里江，伏湖口後山。士卒皆捫蘿上犁旦。彭公率戰舟攻湖口。東游擊黃君翼升率戰舟攻梅家洲。提督楊公岳斌夾擊下鐘山。賊方悉銳拒公。率師從山椒破空下，賊大驚，遂殲其眾。湖口復。梅家洲賊棄城遁。於是內外水師

始會合乘勝復彭澤夷小姑狀僞城得 旨除浙江布政使返九
江適臨江逸賊竄興國冒雪遣兵往援擊走之八年水陸晝夜攻
九江穴城城崩爲磚石所壅至稍遲賊旋堵禦公令壯士數百人
擁盾自蔽先夕伏城濠四月七日地雷復發勇自濠內奮呼登城
城拔殄賊數萬無脫者啟榮死亂軍中磔其屍九江平加巡撫銜
賞穿黃馬褂許專摺奏事方九江之破也公請假歸省甫抵鄂
而悍酋陳玉成由安慶糾潛太英霍賊分擾蘄黃警報日數至未
幾賊間道犯黃安公弟續宜分兵馳援不利公聞警取道黃陂約
夾擊敗賊黃安門外賊遁麻城賊亦不戰走乃還鄂時皖中糜爛
奉 命越境勦皖 詔將軍都興阿總兵鮑超率馬步軍由宿松

趨安慶公由英山趨太湖乃令續宜駐軍鄂渚自帥八千人啟行
議者謂出境勦賊宜益兵爲四翼各三四人而自帥中軍五路
並進公以餽餉難之會會公奉 詔墨經起視師與公會於蘄州
公遣將朱品隆唐義訓分千人爲會公衛議者又謂宜調鄂中守
礪勇以換畱防九江彭澤之湘軍六千人隨同勦皖公以更調需
時日卽率守礪勇以行抵太湖適署皖撫李公孟羣師潰廬州
詔公及都公改道援廬公與諸將議曰由太湖救廬凡數百里廬
已陷師至緩不能濟急且太湖圍撤賊由豫北竄是腹背受敵也
遂決計取太湖掃蕩桐舒等縣直趨廬州時咸豐八年八月也是
月克楓香驛小池驛賊巢復太湖乘勝復潛山遂進掃三河集三

河集者廬州要害也。賊築城，傳以九壘守，以悍賊數萬。三河破，然後可進。規廬州，自克桐城。後公令總兵趙克彰率六營守之。又命副將謝永祐守舒。於是所部僅五千人。九月二十八日，抵三河。十月二日，破賊九壘，斬馘數千計。忽僞英王陳玉成自江浦六合率大隊來援。僞侍王李世賢自廬州糾捻匪來援。眾十萬，連營金牛鎮、白石山等處，烽火亘數十里。諸將議退守桐城。公曰：「軍事有進無退，當死戰。」遂飛檄各防軍來援。未至，初九日，援賊蝟集。明日，迎擊至黎家渡，突遇大隊賊。天大霧，賊用眾抄擊我軍，相繼潰。副將劉神山參將彭友勝游擊胡廷槐鄒玉堂杜廷光等先後戰死。公傳令軍中嚴守牆壘，無何各壘皆破。運同丁銳義馳入湘右營，誓

同公死守或勸突圍出圖再振公曰軍興十年皆以退走損國威吾當縱橫血戰多殺一賊卽爲國多除一害且吾前後數百戰每出隊卽不望生還今日固必死有不願從死者各爲計諸將士皆曰某等願從公死日暮賊攻益急公上馬開壁馳擊殺賊數百人夜二鼓總兵李續燾副將彭祥瑞等越壘衝出賊遂踞其壘決河隄斷我軍去路公知事不可爲具衣冠望闕叩首取所奉廷旨及批摺焚之曰不可使宸翰辱賊手乃躍馬入賊陣身被重創見黃旂知爲賊渠曰此吾畢命處也馳入死之同知曾君國華知府何君忠駿知州王君揆一同知董君容方知縣楊君德閻從九品李君續藝張君溥萬皆殉焉道員孫君守信與丁君銳

義猶激厲士卒死守中右營至十二日水火俱盡營陷皆死之是役也文武官弁死者數百人兵勇數千人而中右一營爲尤多云事聞

上震悼手敕曰詳覽奏牘不覺隕涕惜我良將不克令終尙冀忠靈不昧再生申甫以佐予也又詔贈總督照總督陣亡例賜卹入祀昭忠祠其父登勝賞一品封典並銀五百兩子光久光令賞舉人敕湖北江西安徽湖南湘鄉各建專祠事蹟宣付史館尋賜祭葬予諡忠武公崛起田間以平賊自任選士以知恥敢戰爲上每臨陣安閒靜鎮不苟接刃尤能以少擊眾大小數百戰未嘗挫衄在軍號令嚴明所至百姓懽迎耕市不擾轉

天岳山館文鈔

卷五

傳

禿

戰江鄂間所過州縣不見客不索供張廣坐中言不輕發他將多以氣節相高公默然深藏恆曰事由心定毋張皇性至孝克九江後乞假省親既不果乃爲迎養計其父以書報之曰軍事方殷兒當壹意報國勿以我二人爲念公省書掩涕及拔營握胡公手痛哭曰吾無繇復見父母也左右皆感泣公與諸帥共事和衷商推胡公撥撫標兵萬人隸公戲下皆心服樂爲之用其臨陣專以救敗爲務全大局爲先遇賊則讓人禦其弱者而已當其悍者分軍則以強者與人而畱弱者以自隸江楚兩軍每言肯接帶弱兵臨陣救人者塔忠武後公一人而已公卒年四十一舒城難民覓其遺骸送霍山大營同治元年詔湖南巡撫遣官卽家賜祭

三年克復江甯 賞二等輕車都尉

贊曰太史公云余睹李將軍悛悛如鄙人口不能道辭及死之日天下知與不知皆爲盡哀彼其忠實心誠信於士大夫也烏虜殆忠武之謂歟公性廉軍中所餘俸餉纖毫不自私嘗寄助彭侍郎水師餉曾撫邵吉安軍餉各萬金而元度駐軍貴溪公亦飲之五千金且侑以書曰戔戔者不足道聊分灼艾之痛耳烏虜卽一端不已得公之大凡哉

王壯武公別傳

王公諱鑫字璞山。湘鄉人。年十歲。母病疽甚劇。公吮之。籲天乞身。代數日瘳。尋從羅公澤南遊。二十四補弟子員。咸豐二年。粵逆犯長沙。公上書知縣朱君孫詒。請練民兵討賊。朱壯之。令與羅公募鄉勇教練。屯縣北馬坵埔。防縣城。明年春。巡撫駱公命帥三百人擊衡山土寇。追及安仁。滅之。五月。擊桂東賊。未至。賊走。追及龍泉。大破之。師旋。察得桂東積盜百餘人。悉誘擒。伏法。七月。廣東賊自樂昌陷興甯。公簡死士百人。疾馳三晝夜。未明。薄城。鏖戰盡殲之。復其城。初。保縣丞晉知縣。及是。遷同知直隸州知州。賜戴藍翎。會賊攻江西南。湖南援師失利。死事者多。公親舊公憤甚。謁侍郎曾

公請增軍殄賊。曾公令稍增募。公遽募三千四百人。曾公以進驟而費繁。檄令裁省。公缺望。請併撤歸。駱公閱其軍可用。汰畱二千四百人。公令軍士足各縛鐵瓦。習超距。又以意爲陣法。左右隊魚貫分兩行。鼓作左馳右。右馳左。三馳而圓。皆持滿外向。再鼓之。左右馳復其伍。相向格鬪。左起則右伏。右起左亦如之。三起三伏。乃變圖爲方。後軍分左右出。蛇行繞攻前軍。三合而退。前左右軍皆然。當嚴鼓時。旗周麾。卒周馳。圍聚爲城郭。疾如風雨。公手赤幟。自校之。四年二月。賊自武昌上犯。入岳州。湘陰及靖港分黨陷甯鄉。公敗賊靖港。適訓導儲君孜躬亦擊敗甯鄉賊。賊下竄。公追及岳州。未幾。曾公親帥水陸軍抵岳。三月。公獨進勦崇陽。通城師抵羊

樓崗驟與賊遇前軍失利退岳州賊躡蹤至曾公遣部將楊名聲
鄒壽璋等禦之皆敗潰賊圍公城內糧盡殺馬以食曾公遣戰船
迎公得脫城尋陷死者千餘人坐輕進失利削籍賊仍由湘陰甯
鄉竄陷湘潭四月朔水陸軍大破賊於湘潭賊由甯鄉下竄分黨
自易俗河口至石潭取甯鄉間道公時在馬坵埔急起截擊追至
通湖橋賊皆落水死既而駱公令帥勇五百人防郴州道平嘉禾
藍山土寇會廣西賊萬餘人嘯聚桂林地接江華之嶺東巡撫檄
公赴江華與守備周公雲耀協防閏月賊犯江藍廳之錦田擊走
之九月恭城賊竄永明之桃川灌陽賊圍道州州牧馮崑禦之糧
且盡公及周公赴援屬疫作僅簡三百人自隨戰竟日賊敗遁公

策賊必乘虛襲江華與周公晝夜馳百四十里待賊至迎擊大破之進擣桃川出龍虎關破恭城賊於栗木街回擊甯遠藍山圍城賊圍悉解而江華永明賊復大至公回駐道州兄勦率五百人來會復破賊龍虎關分軍駐錦田嶺東備粵寇又削平甯遠藍山嘉禾諸醜類南鄙略靖公復職賜戴孔雀翎五年春逆渠朱洪英陷富川江華永明大震公及周公往援屢創賊會僞鎮南王胡有祿自連州入楚境與朱逆合攻永明公與周公協勦設伏敗之功最擢知府賊遁出龍虎關陷灌陽尋繇全州竄陷東安公與周公進攻東安城自四月至七月杪血戰數十次陣亡三十餘人受創四百二十餘人乃拔之賊竄全州亡何胡有祿掠東安祁陽界公

敗諸桐子山。越日擒有祿。餘黨踞四明山。又追殲之。詔以守巡道用。別賊何祿自宜章陷郴桂。及永興分黨陷茶陵。將繇耒陽犯衡州。巡撫檄公守衡。命勦增募千人。公以五百人駐耒。自帥千人攻桂陽。再戰復之。餘賊併踞郴城。凡數十戰。乃復遁。者尙萬人。公會鄉團追勦。十二月五日戰黃沙堡。追至兩廣墟。賊方食。官軍乍至。奪其食而殲之。先是朱洪英寇新甯。爲邑人劉公長佑所敗。竄永州界。周公雲耀連敗之。及回粵。復糾黨來攻永明。知縣逃。周公力戰死。城遂陷。方公之攻郴也。逆渠蕭元發率賊七千有奇攻桂陽。爲鄉兵所敗。竄入甯遠。九疑山參將蕭公永年追擊遇害。遂陷江華。與永明賊相掎角。公進戰復永明。六年正月復江華。窮追至

連州境盡殲之朱逆跳而免二月戰西岸三月屢捷於陽山賊竄英德之大灣詔以楚境肅清賞四品封典當是時軍中瘴疫作死亡相屬公亦積勞思稍假休沐而江西州郡連陷羅公澤南戰歿武昌李公續賓馳書約公綴賊上游公卽投袂起轉戰崇陽通城通山蒲圻界復其城斬逆首張庸忠陳華玉敘功加按察使銜七年春奉詔援江西公自是屢奏奇捷竟以勞卒軍矣初官軍水陸圍吉安其攻臨江者亦掘長濠困賊逆渠胡壽階何秉權率數萬賊來援據水東與城賊夾江相望公至沿贛水而南自三曲灘濟壁水東東南山上賊鼓譟乘之公方眠大樹下欠伸徐起部署畢攜鼓登望樓令士卒俯首結壘仰視者斬賊大疑不敢前

稍進士仍結壘不輟俄而山後一軍出賊背賊遽退望樓鼓發士
投舂操戈大呼馳出左右伏兵齊起斬秉權蹙其左軍入水餘賊
走入水東壁眾請具餐公曰今日不克水東不遑食也遂揮軍擣
賊壘都司易普照窺壘孔中鎗死眾奮曰當爲易將軍報仇爭入
壘殺賊數千壽階遁五月賊自萬安屯藤田將出樂安解吉安之
圍公與遇於流坑壽階忿前衄糾黨數萬自甯都據沙溪出藤田
後公掩擊其前鋒於陂頭復敗諸沙溪越日賊悉銳犯藤田公先
擊其左自帥死士百人擣其右賊崩奔再蹙之瑤嶺嶺險狹賊悉
墜巖洞腹碎首以死遂擒壽階是役也兩廣凶悍賊俘斬殆盡閏
月賊自甯都出數萬人據永豐之韶源冀援吉安公以千二百人

轉戰屢敗之。追及甯都之釣峯。賊爲背水陣。旣敗。盡沒於水。師踐積屍以渡。斬僞將軍蕭復勝。復破賊於古夏。再破新城賊數萬於東山。垣斬僞總制張宗相。其時僞國宗楊宜、清楊輔清等憤其眾屢勦。糾黨十萬有奇。據廣昌之頭陂。誓與公決死戰。傳令前者卻後則刃之。公偵知。喜曰。賊散則難圖。聚可一戰殲也。乃勒兵大戰。公先馳馬陷陣。壯士從之。呼聲震林樾。賊大潰。逐北六十餘里。斬級萬別。遣將復樂安。公自渡贛。九十日中大捷十有二。皆以寡勝眾。賊望見公旗幟輒膽掉。呼爲王老虎。士民鼓掌歎咤。牛酒相屬於路。於是江西兩湖三巡撫均以狀聞。賜號愛什蘭巴圖魯。會吉安軍敗。丐援。公密令鄉團張己幟。僞爲趨建昌狀。而潛返藤

田吉安軍氣復振。七月，賊自宜黃窺樂安，圖出永豐解吉甯圍。撫
州賊亦來會，公抵樂安，誘賊於城下，敗之。明日再敗之於崇仁太
平市。又明日，大膊於林頭，賊用騎兵數千突陣，公誠藤牌軍，俛首
砍馬足，自領精銳橫貫賊陣，斬級數千，獲馬二百匹，俘八百人。會
疾作，返樂安，數日卒。時八月四日也。年三十有三。優旨，梓惜贈
布政使。敕江西湖南建專祠。子謐，壯武。卹廕如公。式公貌
不逾中人，膽力沈鷲，負氣好奇，用兵亦以奇勝。疾馳掩捕，嘗出人
意表。於風雨險艱，一無所阻。御眾嚴而有恩，軍暇輒令讀孝經四
書，士卒化之。嘗追賊乏食，掘民間山藷，各投錢於穴，償其值。民間
爲立生祠，嘗自憾用世太蚤，學未充，優禮文學士如不及甯遠張

老人者年百十有八矣貧不能自存公造其家厚恤之爲娶子婦比旋師經其地老人已抱孫矣乃以封公生日偕老人及賓佐登九疑張宴作樂遙爲親壽公以久違子舍語次歎歎老人執爵言曰公愼自愛第患功業弗建爲親恥耳服勞奉養抑末也眾疑其言公所著有練勇凡說陣法新編尺一偶存

贊曰公與曾相國同里閭相國檄令滅鼃蓋未深悉其能也不且舉國以聽矣公自是別爲一軍垂翅後折節自勵卒能出奇兵以寡克眾每變益上能者固不可測哉士有青雲之志不甘附驥尾卒顯名天下不尤足壯耶然觀其自憾用世蚤未竟所學公其非挽強鳴鏑中人歟

張忠毅公別傳

張公運蘭字凱章湘鄉人性沈毅有智略初從王公鑫募湘勇轉戰衡永郴桂各屬累功洊保同知特旨賞封典咸豐六年武昌賊上犯從王公馳援獨勦通城賊敗諸石枰橋遂駐通城崇陽告急夜馳百二十里犁旦與王公會大破賊於白蜆橋論功賞戴孔雀翎七年從王公援江西轉戰臨江吉安敗賊於樂安新城追擊至廣昌公功皆最王公卒於軍公與王公開化代其任會吉安賊窺永豐公敗賊於羅湖橋越日賊復大至公出奇兵敗之野鵲橋詔晉知府加道銜畱防安福是年八月臨江援賊犯新喻公擬扼峽江之橋埠灘師抵獅子山賊忽兩路至勢張甚公揮軍敗

其西路明日復敗南路賊於張村盡破賊壘燔其輜重援賊遁遂移營吉水扼賊三曲灘相持數日血戰十數次斬逆渠黃錫崑賊不敢越贛江一步十一月僞翼王石達開悉銳來犯公急渡贛江扼之賊不敢逼旣而連敗賊於朱山橋高橋中坑等處斬逆目數十人明日又及賊血戰朱山橋石逆大創焚屯遁遂解永豐圍

詔晉守巡道明年自永豐略定樂安宜黃破磁圭賊巢復南豐建昌詔加按察使銜七月賊復犯南豐擊走之追及新城之杭山降其眾數千當是時特詔起侍郎曾公國藩於家治浙江軍務曾公行次江西賊已入閩擬援福建疏調公及蕭公啟江各帥所部從公赴廣信適賊陷安仁別將失利公進擊大破之殲賊數千

賜號克圖爾格依巴圖魯將入閩會新城告急公馳援至則劉公長佑已破賊賊竄閩公遂由杉關入閩破賊順昌賊出竄甯都劉公追擊之公以景德鎮官軍失利率所部往援十二月抵李村見數十騎列河岸公曰此設伏誘我也然我軍初至不濟賊且謂我怯乃揮眾渡伏賊萬餘突起逆渠八人跣水來犯公礮斃其一猛追之八人者皆殪遂濟河鑿擊斬馘二千有奇解散千計赭其巢時大雪振旅時衣盡白堅冰凝靴韌不能動九年正月饒州軍敗於牛角嶺賊大至公分兵赴援再殲其眾於栗樹山六年大破景德鎮賊賊竄浮梁明日我軍復浮梁詔加布政使銜是年秋粵賊犯湖南公奉檄回援屯郴州破星子九陂石塘等巢殄賊萬有

旨除開歸陳許兵備道十年會公以兩江總督授欽差大臣
疏調公赴皖屯旌德遣將會同提督鮑公超復黟又同破賊於盧
村賊遁明年三月克休甯得旨以按察使記名簡用五月再復
黟盡夷其壘賊踞徽州已一年至是偪軍威棄城遁公畱徽尋以
病歸同治元年際福建按察使明年奉詔援廣東擣陽山石塋
堅巢降其眾三千擒巨酋李復猷於連州復猷石達開餘黨也最
狡悍爲川黔楚粵患數年至是伏誅邊民酌酒相慶會英德降賊
鄧二復叛嘯聚鶴鵲山公帥師擣其巢擒斬之三年春平土寇陳
仰古屬閩賊鵬張公帥師往援駐武平九月十一日出隊擊賊逐
北數十里而廣東平遠賊適至乘虛攻陷武平公聞警急回賊從

聞道截出我軍首尾莫能顧總兵賀公世楨王公明高副將雷公
照雄等皆戰死公力竭被執大罵不屈賊怒支解之賊黨後都司
湯友德得公遺骨於亂屍中又得其元於學宮面如生狀 聞

天子悼閔加等 賜卹 贈巡撫 予謚忠毅 賞騎都尉世職

詔武平及湖南各建專祠弟運桂累功擢總兵 賞花翎 賜

號彥勇巴圖魯先公二年卒於軍

贊曰余初未識公聞王壯武卒後賊適大至眾兇懼公屹然不動
聲色三曲灘諸戰力遏援賊使吉安得竟其功意其人必魁傑非
常士及公隸湘鄉相國戲下余與合肥李相國同綜理營務始晤
公貴溪恂恂書生耳而其後死事乃獨慘烈悲夫